

Аёллар сочларини ҳар хил соч бўёқларида, масалан «АСМА-COLOR» деганида бўясалар бўладими

18:41 / 26.04.2016 6147

САВОЛ: Аёллар сочларини ҳар хил соч бўёқларида, масалан «АСМА-COLOR» деганида бўясалар бўладими? Ғусл, таҳорат қилса ўтадимми?

ЖАВОБ: Бисмиллаҳир роҳманир роҳийм.

Сочни бўяса бўлади ва ғусл ҳамда таҳоратга зарари йўқ. Бу ҳақда муҳтарам устоз доктор Ваҳба Мустафо Зуҳайлий ўзининг «Фатавий Муосира» номли китобида қуйидагиларни ёзади:

«Набий соллаллоҳу алайҳи васаллам оқарган соч ва соқолни бўяшни мубоҳ қилганлар. У зотдан собит бўлган ҳадисда бу маъно бор.

Абу Ҳурайра розияллоҳу анҳудан ривоят қилинади:

«Набий соллаллоҳу алайҳи васаллам:

«Албатта, яҳудий ва насоролар бўямайдилар. Бас, уларга хилоф қилингиз», дедилар».

Бешовлари ривоят қилган.

Шофеъийлар қорага бўяшни ҳаром дейишган. Чунки Набий соллаллоҳу алайҳи васаллам Абу Бакрнинг отаси Абу Қу-ҳофани бундан қайтарганлар. Унинг соч-соқоли ҳақида «иккисини ўзгартиринг-лар, қорани четлатинглар» деганлар.

Лекин фуқоҳолар жумҳури буни Абу Қуҳофага ўхшаган ўта қари одамларга хос деганлар. Саҳоба ва тобеъинлардан бир жамоалар, Усмон, Ҳасан, Ҳусайн, Уқба ибн Омир, улардан кейин Ибн Сирийн, Абу Бурда ва бошқалар қорага бў-яшган».

Уламоларимиз бу масалада, хусусан, сочни қорага бўяш ҳақида турли ҳолатларни эътиборга олиб бир қанча гапларни айтганлар.

Жумладан оила қурмоқчи бўлган одамнинг алдаш учун сочни қорага бўяш ҳаром деганлар.

Аёл кишига эри рухсат берса жоиз деганлар ва ҳоказо. Валлоҳу аълам.